



Broj: 02-04-767/21
Datum, 31.05.2021. godine

ZAPISNIK sa 7. redovne sjednice 7. saziva Općinskog vijeća Doboj Istok

Sedma redovna sjednica 7. saziva Općinskog vijeća održana je dana 27.05.2021. godine u zgradi općine Doboj Istok u Klokotnici sa početkom u 10,00 sati.

PRISUTNI: 16 vijećnika, Kemal Bratić, općinski načelnik, Omer Hadžić, sekretar općine, građanka Selma Karić, te predstavnik RTV TK.

ODSUTNI: Senada Džanić, predsjednica kluba vijećnika SBB – BPS - SBiH.

Sjednicu je otvorio i vodio predsjedavajući Općinskog vijeća, Selmin Karić.

Selmin Karić, predsjedavajući Općinskog vijeća: „ Uvaženi načelnice, kolegice i kolege vijećnici, gosti esalamu alejkum i dobar dan. Otvaram 7. redovnu sjednicu 7. saziva Općinskog vijeća Doboj Istok. Molim tehničkog sekretara da utvrdi broj prisutnih na današnjoj sjednici. Prisutno je 16 vijećnika, što znači da imamo kvorum i možemo nastaviti sa radom.“

VIJEĆNIČKA PITANJA I INICIJATIVE

Selmin Karić, predsjedavajući Općinskog vijeća: „ Ako ima neko pripremljeno vijećničko pitanje ili inicijativu od vijećnika, izvolite.“

Zerina Subašić, predsjednica kluba vijećnika PDA i NL Doboj: „ Ja bih da vas sve poselamim i pozdravim. Vijećnička inicijativa ispred kluba PDA i Nezavisna lista Sevlid Hurtić podnosi inicijativu na nastavku regulacije rijeke u MZ Stanić Rijeka kroz centar naselja od dosadašnje regulacije pa do kuće Kavazović Mirsada.

Obrazloženje: U proteklom periodu je MZ Stanić Rijeka bila ugrožena ovim vodotokom kako stambeni objekti i putna infrastruktura, tako i poljoprivredno zemljište koje se nalazi uz ovaj vodotok. Dosadašnjom realizacijom projekata na ovom vodotoku riješene su kritične tačke u centru naselja i ispod magistralnog puta, te je ostalo rješavanje u gornjem toku gdje se nalaze dva vodotoka i ulijevaju u jedan, a u neposrednoj je blizini lokalnog mezarja i stambenih i poljoprivrednih objekata. Realizacijom bi se kompletirao projekat i zaštili stambeni objekti i zemljište.“

Emira Karić, predsjednica kluba vijećnika SDP: „ Takođe bih vas srdačno pozdravila. I ja imam jednu vijećničku inicijativu, a inicijativa se odnosi na postavljanje saobraćajnog ogledala kao opreme za omogućavanje učesnika u saobraćaju na nepreglednom mjestu u ovom slučaju: raskrsnica lokalnog puta u Brijesnici Maloj (glavni ulaz u Bijesnicu Malu) i magistralnog puta Doboj-Tuzla. Prilikom skretanja iz Ulice Armije RBiH na magistralni put vozači nemaju preglednost da uoče vozila koja dolaze sa lijeve strane. Saobraćajno ogledalo će poboljšati pregled u mrtvim uglovima, neprijatnom izlazu i dozvolit će siguran izlazak sa puta, samouvjerenije skretanje na raskrću i smanjenje mogućnosti sudara. Inicijativa se upućuje prema općini Doboj Istok i nadležnima koji upravljaju ovim saobraćajnicama. Budući da budžet

općine Doboj Istok nema konta postavljanje saobraćajne signalizacije, općinski načelnik će pronaći konto sa kojeg se može izvršiti plaćanje realizacije ove inicijative. Ja bih samo napomenula zašto se ova inicijativa odnosi samo na raskrnicu ulaz u Brijesnicu Malu. Ja sam zaista prošla sve raskrsnice, odnosno sve puteve koji se križaju sa magistralnim i niti jedan nije u ovakvoj situaciji kao što je u Brijesnici Maloj, a možete i sami provjeriti. Dakle to je isključivo izlaz sa lijeve strane, odnosno preglednost sa lijeve strane i smatram da bi se ovim ogledalom riješile i te stvari. Što se tiče i to sam se informisala, to bi bilo neko ogledalo dimenzija 1000 x 800 mm i koliko sam cijenu našla najskuplja je 600 KM. Mislím da za tako mali novac riješila bi se itekako jedna pozitivna stvar, da ne govorim o nekim negativnim ishodomima.“

Kemal Bratić, općinski načelnik: „ I ja bih vas poselamio i pozdravio. Što se tiče ove inicijative meni su već vijećnici Mašić i Karić govorili o tome i mi smo već naručili ogledalo da se to uradi, tako da to neće biti sporno. Naravno podržavam i ovu inicijativu od uvažene vijećnice Subašić, tako da su meni ove inicijative prihvatljive, jer evo već smo pokrenuli nabavku tog ogledala za taj dio. Imaju još dvije tri tačke koje su veoma specifične i potrebno je da se ugradi a ne samo u Maloj Brijesnici. Prošle godine smo jedan dio tih ogledala postavili oko 10- tak, čini mi se, a i ove godine ćemo nastaviti u svim mjesnim zajednicama, jer vidio sam i u Stanić Rijeci na par mjesta, na baš kritičnim mjestima gdje ćemo uraditi, ako ništa 10 – 15 ogledala i u zavisnosti od potrebe bit će odabrane dimenzije preko Komisije za saobraćaj općine Doboj Istok.“

Emira Karić, predsjednica kluba vijećnika SDP: „Ja bih zamolila i općinskog načelnika i službe da ili pod nekom tačkom dnevnog reda realizacija budžeta ili plan rada općinskog načelnika nama u narativnom dijelu otprilike prikažu radnje koje su poduzete i koje su planirane da se mi ne bi ovdje uvijek duplirali, jer ko kaže da vi nećete poslije moju inicijativu, ne da vam ne vjerujem u svakom slučaju, ali ja je ne bih podnosila. Možda će biti još mnogo inicijativa, a mi o tome nismo upoznati i moj prijedlog je kada je plan rada načelnika ili kada je u pitanju realizacija budžeta da se u nekom narativnom dijelu kaže u toj i toj godini planiramo to i to itd. da bespotrebno ne podnosimo ovakve inicijative.“

Refik Šuvalić, vijećnik SDA: “Gospodine predsjedavajući, načelniče, kolegice i kolege da vas sve srdačno poselamim i pozdravim. Ja imam dvije inicijative. Jedna se odnosi da općinski načelnik sa službama općine i nadležnim kantonalnim institucijama iznađe način u rješavanju zaštite poljoprivrednih dobara i stanovništva od najezde divljih svinja.

Obrazloženje: Veći broj poljoprivrednika naše općine je izrazio zabrinutost zbog šteta na usjevima kukuruza, krompira i dr. koje su izazvale divlje svinje u brdskim djelovima naše općine. Prema posljednjim informacijama isti su počeli praviti štetu u blizini naseljenih mjesta što izaziva još veću zabrinutost i strah građana. Znamo da imamo generalno u cijeloj državi problem sa poljoprivredom od ovih elementarnih nepogoda i svega drugog, a sve je više zapuštenih parcela i na našem području imamo malo ljudi koji su se odlučili da se bave poljoprivredom i dosta su ugroženi. Ja sam u dva slučaja izlazio i vidio sam da su stvarno štete dosta velike.

Druga inicijativa je, mislim da većina nas zna za taj problem, a odnosi se na to da općinski načelnik sa menadžmentom Doma zdravlja Doboj Istok i nadležnim kantonalnim ministarstvom iznađe način rješavanja i rješenje o angažovanju pedijatra u JZU Dom zdravlja Doboj Istok. Zbog dugogodišnjeg problema neangažovanja pedijatra u JZU Dom zdravlja Doboj Istok zaprimio sam više pritužbi i molbi građana općine Doboj Istok kojim je neophodna usluga pedijatra da se isti angažuje kako bi omogućili nesmetano i ekonomičnije liječenje naše djece. Poznato je da od vremena kada nemamo pedijatra naši građani su prinuđeni da vode djecu uglavnom privatnim pedijatrima koji rade u okolnim općinama. Znajući da nam je to nešto najvrednije i da imamo veliki problem sa natalitetom mislim da bi to trebalo. Imam neke informacije i drago mi je da bi Dom zdravlja brzo trebao da ima specijalistu i ako nema rješenja za puno radno vrijeme da se bar 2 – 3 dana u sedmici pokuša iznaći rješenje dok se ne riješi ova specijalizacija.“

Haris Sinanović, vijećnik SDP: „Pozdravljam sve prisutne. Ja bih dodao nešto vezano za inicijativu Zerine Subašić. Što se mene lično tiče, nije sporno podržat ću tu inicijativu, međutim rekao bih par riječi vezano za tok rijeke kroz Stanić Rijeku. 53 godine živim na jednom mjestu i kao dijete sam upamtio, dole gdje se moja kuća nalazi, da je svaki puta kada je ta rijeka izljevala da je moja kuća plavljena. U stvari nije kuća nego dvorište i svo smeće i blato prođe kroz moju kuću. Postavio sam vijećničko pitanje i unazad mjesec odgovoreno mi je da je u planu općine da se korito radi do 2027. godine, ako se ne varam. Znači molio bih ako može da se ova inicijativa proširi pošto je urađeno do Dedića kuća i ostavljene su samo tri kuće u polju moja kuća, mog amidžića Ibri i Mrkija. Mene to podsjeća na onaj film Ničija zemlja kada je onaj ostao ležati na mini, a svi se pokupili i otišli. Mislim ako se riješi gornji dio rijeke protok vode će biti dobar i ako dođe do nekog začepjenja opet će te tri kuće poplaviti. Mislim da bi bilo dobro da se razmisli da se ulože sredstva, jer nije to puno, možda od Dedića još nekih 100 metara da se uradi. Samo toliko, ništa više.“

Kemal Skopljak, vijećnik BPS – Sefer Halilović: „ Pozdravljam i selamim sve prisutne. Ja bih kratko prokomentarisao. Što se tiče ovih inicijativa, one su sve u interesu građana općine Doboj Istok i sve takve inicijative treba podržati. Ja u svoje lično ime govorim da ću podržati i Zerininu inicijativu koja je u interesu građana općine Doboj Istok, a posebno Stanić Rijeka. Podržat ću i ove druge inicijative. Što se tiče inicijative vezane za Dom zdravlja u par mjeseci se radi o završetku specijalizacije doktora Halida. Tako da ćemo mi imati pedijatra gore, bar u početku 4 sata, a zavisi od vremena koliko treba i ako bude dovoljno pacijenata može se to radno vrijeme i produžiti, ali dovoljno će to biti.“

Kemal Bratić, općinski načelnik: „ Vijećnik Skopljak mi je uzeo dio diskusije. Znači ono što smo promijenili u nekom prethodnom periodu jeste da smo na specijalizaciju poslali ginekologa i pedijatra, jer smo u prethodnom periodu imali problema. Nažalost neki od ljekara su vezani ugovorom i moraju ostati određen broj godina, mislim da 8 godina pedijatar mora da ostane, jer je specijalizacija išla preko doma zdravlja. Ima onih koji su specijalizaciju plaćali u vlastitoj režiji i ima onih kojima je dom zdravlja platio specijalizaciju, pa su napustili, pa je to sada na sudu itd. Svaka inicijativa koja se podnese treba prvo znati da li ju možemo provesti, jer svaka inicijativa je dobra, ali da li ju možemo provesti i da li možemo obezbijediti sredstva. Najlakše je napisati inicijativu, bilo koju inicijativu. Nemojte me pogrešno shvatiti, jer današnje inicijative i većina njih su izvodljive i većina njih je na neki način planirana da se radi u nekom narednom periodu. Ova diskusija vijećnika Harisa Sinanovića, nije to ničija zemlja, jer smo išli logikom. Sredstvima kojima su rađeni prethodni projekti u MZ Stanić Rijeka je rukovodilo federalno Ministarstvo poljoprivrede i projekat je u vrijednosti cirka 500 ili 600.000 KM. To je dio koji je urađen do kuća Dedića. Vi ste govorili o nastavku ispod magistrale, ako sam dobro razumio, mi smo uradili jedan dio iz sredstava civilne zaštite, a jedan dio iz budžeta općine Doboj Istok i nastaviti ćemo naravno. Rukovodili smo se time da idemo tamo gdje ima više, jer je više stambenih, poslovnih i pomoćnih objekata bilo ugroženo. Složit ćete se sa mnom da smo uradili najurbaniji dio naselja u nekom prethodnom periodu, jer znamo kakve su tamo bile poplave. Molio bih vas, jer ima inicijativa koje je nemoguće izvesti, pa će neko reći da neće načelnik da to, a hoću, jer svaku dobru inicijativu ja pozdravljam, ali moramo voditi računa koliko ona košta, kako ćemo je uraditi i odakle ćemo je uraditi. Zamolio bih vas da u narednom nekom periodu vodite računa da je još uvijek pandemija i da su budžeti prepolovljeni svi, ne samo naše općine, od kantona do Federacije. Evo iskreno se nadam, jer dobio sam obavijest da će nam federalna vlada pomoći, jer kantonalna neće. Valjda ne može, ne znam ni ja, jer dobili smo obavijest da ni na šta ne računamo, tako da je situacija još uvijek složena. Ipak moramo priznati da smo tamo veći dio posla završili kada se radi o inicijativi vijećnice Zerine i vašoj diskusiji. Ostalo gledat ćemo u našem planu da realizujemo i da jedno po jedno završavamo. Pored ovoga što je uvaženi vijećnik Šuvalić rekao, ja znam da za par mjeseci specijalizaciju završava naš ljekar Halid, ali imamo problema sa azbestnim krovovima i imamo nedostatak prostora tamo u Domu zdravlja. Sve su to stvari o kojima neko misli i koje će neko da radi u nekom narednom periodu. Ja pozdravljam

svaku inicijativu, ali vas molim da one budu realne. Ne govorim za današnje nego ubuduće da budu realne i da ih možemo provesti. Najlakše je da ja sada sjednem i napišem 40 inicijativa i sprovedi Osmane, Izete i to je najlakše. Po meni do kraja jula će se ova pandemija, ako Bog da, evo dosta njih će se vakcinisati, ali na svu sreću privreda nam nije toliko fasovala, da tako kažem, tako će od jula po meni biti puno bolja situacija i ići ćemo u realizaciju određenih projekata koje ste i vi predložili i koje naši građani traže i koje smo mi zacrtali u svom planu.“

Haris Sinanović, vijećnik SDP: „Moram još jednom reći. Znači čim su jače kiše mi živimo dole u strahu, u ove tri kuće. Do sada je bilo 5 – 6 kuća i one su na neki način zaštićene kada je dio ispod magistrale urađen do Dedića kuća. Protok vode je kroz čitavo selo i stvorilo se sada usko grlo gdje su ove tri kuće i ako dođe do većih padavina i do mogućnosti izljeva vode, opet će te tri kuće nastradati. Samo sam želio da kažem da se to pokuša uvrstiti u neki prioritet. Nije sporno ako se ne prihvati ovo moje iz finansijskih razloga ili šta ja znam, ali nisam upamtio da se onaj dio na koji se odnosi inicijativa da je poplavljen ikad, bar zadnjih godina koliko ja znam. Ako postoji neka mogućnost, ne mora se betonirati, ali da se poreda kamen onako kao što je urađeno u oktobru mjesecu iza kuće mog amidžića bar 10 – 15 metara i neka onda izljeva dole u njive.“

Selmin Karić, predsjedavajući Općinskog vijeća: „Zahvaljujem se kolegi. Evo načelnik je išao u tom pravcu da se u narednom periodu i taj dio riješi, koliko sam ja shvatio načelnika. Naravno svi oni koji predlažu određene inicijative i ako te inicijative iziskuju određena materijalna sredstva su u obavezi i da kažu odakle bi ta sredstva trebala da dođu.“

Kemal Bratić, općinski načelnik: „Ponovo vas molim da ne shvatite krivo. Ovdje ima ljudi koji znaju kako je donijeti sredstva u budžet sa strane i znaju da to nije ni malo lahko i znaju da se to ne podrazumijeva i znaju da se nekada mogu donijeti sredstva, a nekada ne mogu. Mi upravo realizujemo dva krupna projekta. Jedan projekat je izrada vodootvrde tamo na prostoru prema Stanić Rijeci i zamislite imali smo problema sa ljudima kroz čije njive prolazi i morali smo im čak platiti oštetu, jer smo nešto oštetili. Na svu sreću nisu tražili puno sredstava za tu oštetu i mi smo to regulisali i platili. U susjednoj Mjesnoj zajednici Lukavica Rijeka realizovan je projekat od 260.000 KM i tamo smo imali problema sa imovinskim odnosima. Znači ljudima radimo nešto, a oni nama blokiraju projekat i onda se čovjek zapita da li treba šta raditi. Vjerujte imali smo problema u skoro svim mjesnim zajednicama i na skoro svim projektima. Novac ne pada sa neba i svaki projekat treba izraditi i obezbijediti sredstva, onda dođete na teren, a čovjek kaže ja ne dam da to ide kroz moje, a tamo smo imali plavljenje 20-tak stambenih objekata. Ogroman problem bio u Lukavici Rijeci i na svu sreću i hvala Bogu završili smo i taj projekat. Ja vam obećavam da ćemo do kraja godine uraditi taj dio i ne treba vam inicijativa. Nije bilo inicijative ni za Lukavicu Rijeku, ali je načelnik obezbijedio sredstva, izradili projekat i uradili. Nije ni za ovu vodootvrdu bilo inicijative, ali radimo polako, jer kida ljudima zemlju. Ne bih se složio sa vama za ovu inicijativu, jer gore ljudima potkopava kuću. Ja sam išao tamo i gledao kakvo je stanje, a tamo sa jedne strane je i mezarje. Znači time smo se rukovodili, a ne što ste vi dole uvaženi vijećniče Sinanoviću, pa nismo htjeli raditi, nego je procjena struke bila da radimo gore gdje je naselje najgušće, gdje imamo problem da nečiji stambeni objekat ode, jer će rijeka to potkopati. Naravno da podržavam, jer bio sam u poplavama, čak sam pomagao unositi i sećiju, možda se ne sjećate, znam kakvo je stanje i radit ćemo to. Evo jedno po jedno otkidamo, jedno po jedno radimo i rješavamo probleme. Ja ne mogu da shvatim ponašanje određenih građana zbog tih imovinskih odnosa. Lijepo bi bilo da neko od vas vijećnika izađe i da vidi kroz šta mi sve prolazimo. Evo Refik klima glavom, jer zna, radi na terenu. Obezbijedite sredstva, riješite problem i on kaže ne može to tako, ja hoću ovako. To su problemi sa kojima se mi nosimo i nadam se da će ih u narednom periodu biti što manje.“

Emira Karić, predsjednica kluba vijećnika SDP: „Predsjedavajući, vezano za vašu diskusiju da moramo navesti odakle sredstva, evo vraćam se ponovo na svoju inicijativu. Ja sam gledala neke budžete, doduše gradske budžete koji imaju konto postavljanje saobraćajne signalizacije, pa bih

ja mogla navesti taj konto. Uvijek se može navesti ostale usluge i dadžbine, ali evo dopuna mojoj inicijativi ukoliko se ne može naći konto, ja bih u vlastitoj režiji bila spremna platiti ovu inicijativu. Sljedeće, pošto otprilike znam scenario nakih stvari u Općinskom vijeću i ne želim nikoga provocirati, vijećnici se moraju izjasniti po mojoj inicijativi u suprotno doći će do diskriminacije, a imamo jednu tačku dnevnog reda koja o tome govori.“

Haris Sinanović, vijećnik SDP: „Zahvaljujem se općinskom načelniku i zadovoljan sam odgovorom i obećanjem da će to biti regulisano do kraja godine, tako da još jednom hvala.“

Selmin Karić, predsjedavajući Općinskog vijeća: „ Moja diskusija je bila uopštena i nije uopšte bila usmjerena prema bilo kome. Kada je vaša inicijativa bila u pitanju, kolegice, evo načelnik je rekao da je to u toku, tako da nema potrebe da vi kupujete. Ima li još neko nešto? Nema. Znači imamo inicijativu kolegice Zerine Subašić. Klub vijećnika PDA i Nezavisna lista Sevlid Hurtić podnosi inicijativu na nastavku regulacije rijeke u MZ Stanić Rijeka kroz centar naselja od dosadašnje regulacije pa do kuće Kavazović Mirsada. Obrazloženje ste čuli i dajem na glasanje. Ko je za ovu inicijativu?

Glasanje: ZA – 16, PROTIV – 0, SUZDRŽANIH – 0.

Zahvaljujem se, znači jednoglasno.

Sljedeća inicijativa je kolegice Emire koja se odnosi na postavljanje saobraćajnog ogledala kao opreme za omogućavanje učesnika u saobraćaju na nepreglednom mjestu u ovom slučaju: raskrsnica lokalnog puta u Brijesnici Maloj (glavni ulaz u Bijesnicu Malu) i magistralnog puta Doboj-Tuzla. Obrazloženje ste čuli. Ko je za ovu inicijativu?“

Hasan Hasančević, predsjednik kluba vijećnika SDA, je zatražio pojedinačno izjašnjanje.

- | | |
|----------------------|------------|
| 1. Selmin Karić | - za |
| 2. Hasan Hasančević | - suzdržan |
| 3. Omer Konjić | - za |
| 4. Refik Šuvalić | - za |
| 5. Amir Mašić | - suzdržan |
| 6. Jasmina Mešić | - suzdržan |
| 7. Nusret Dautović | - suzdržan |
| 8. Emira Karić | - za |
| 9. Haris Sinanović | - za |
| 10. Adis Halilović | - za |
| 11. Izet Hodžić | - za |
| 12. Osman Đonlagić | - za |
| 13. Kemal Skopljak | - za |
| 14. Mehmed Mehinović | - za |
| 15. Zerina Subašić | - za |
| 16. Samir Džanić | - za |

Glasanje: ZA – 12, PROTIV – 0, SUZDRŽANIH – 4.

Znači inicijativa je dobila potrebnu većinu.

Sljedeća inicijativa je Refika Šuvalića koja se odnosi na to da općinski načelnik sa menadžmentom Doma zdravlja Doboj Istok i nadležnim kantonalnim ministarstvom iznađe način rješavanja i rješenje o angažovanju pedijatra u JZU Dom zdravlja Doboj Istok. Zbog dugogodišnjeg problema neangažovanja pedijatra u JZU Dom zdravlja Doboj Istok zaprimio sam više pritužbi i molbi građana općine Doboj Istok kojim je neophodna usluga pedijatra da se isti angažuje kako bi omogućili nesmetano i ekonomičnije liječenje naše djece. Ko je za?

Glasanje: ZA – 16, PROTIV – 0, SUZDRŽANIH – 0.

Još jedna inicijativa Refika Šuvalića, da općinski načelnik sa službama općine i nadležnim kantonalnim institucijama iznađe način u rješavanju zaštite poljoprivrednih dobara i stanovništva od najezde divljih svinja. Ko je za?“

Glasanje: ZA – 15, PROTIV – 0, SUZDRŽANIH – 1.

USVAJANJE ZAPISNIKA SA PRETHODNIH SJEDNICA OPĆINSKOG VIJEĆA

Selmin Karić, predsjedavajući Općinskog vijeća: „ Dobili ste Zapisnik sa 6. redovne sjednice i pregledali. Ko je za Zapisnik?“

Glasanje: ZA – 16, PROTIV – 0, UZDRŽANIH – 0.

USVAJANJE DNEVNOG REDA

Selmin Karić, predsjedavajući Općinskog vijeća: „ Za današnju sjednicu je predviđen sljedeći dnevni red:

- 1. Razmatranje i usvajanje Izvještaja o radu JKP “Čisto“ Doboj Istok za 2020. godinu*
- 2. Razmatranje i usvajanje Izvještaja o radu JP Veterinarska stanica Doboj Istok za 2020. godinu*
- 3. Razmatranje i usvajanje Informacije o radu Općinskog suda u Gračanici za 2020. godinu*
- 4. Razmatranje i usvajanje Informacije o izvršenju budžeta općine Doboj Istok za period januar-mart 2021. godine*
- 5. Razmatranje i usvajanje Programa obilježavanja 4. jula Dana brigade.*

Obzirom da smo dobili prijedloge za proširenje dnevnog reda koje imate pred sobom. Jedan prijedlog je razmatranje zahtjeva Ministarstva finansija Tuzlanskog kantona za davanje mišljenja u vezi poslaničke inicijative poslanika Borisa Krešića postavljenoj na Skupštini Tuzlanskog kantona vezano za pokretanje procedure za donošenje dopuna Zakona o porezu na promet nepokretnosti i prava. Obrazloženje: Razlog za proširenje dnevnog reda što je u zahtjevu određen rok od 30 dana od dana prijema ovog zahtjeva za dostavu ovog mišljenja i jedino u roku možemo dati mišljenje ako zahtjev i priloge uz zahtjev razmatramo na ovoj zakazanoj sjednici Općinskog vijeća. Ja se nadam da ste pročitali ostalo obzirom da ste dobili ranije i ja ne bih čitao dalje. Još jedan prijedlog za proširenje dnevnog reda: U skladu sa članom 156. Poslovnika o radu Općinskog vijeća Doboj Istok predlažem da se u dnevni red Općinskog vijeća stavi sljedeća tačka: Razmatranje Odluke o učešću u sufinansiranju izgradnje kuće Hasančević Samira iz Klokočnice.

Obrazloženje: Razlog za proširenje dnevnog reda je što je u toku gradevinaka sezona i treba što hitnije da se rješava stambeno pitanje Hasančević Samira iz Klokočnice.

Znači imamo ova dva prijedloga za proširenje dnevnog reda. Treba li možda neko pojašnjenje? Ne treba. Dajem na glasanje prvi prijedlog razmatranje zahtjeva Ministarstva finansija Tuzlanskog kantona za davanje mišljenja u vezi poslaničke inicijative poslanika Borisa Krešića postavljenoj na Skupštini Tuzlanskog kantona vezano za pokretanje procedure za donošenje dopuna Zakona o porezu na promet nepokretnosti i prava. Ko je za da ova tačka ide na dnevni red?

Glasanje: ZA – 16, PROTIV – 0, SUZDRŽANIH – 0.

Imamo još jedan prijedlog za proširenje, a to je Razmatranje Odluke o učešću u sufinansiranju izgradnje kuće Hasančević Samira iz Klokočnice. Ko je za da ova tačka ide na dnevni red?

Glasanje: ZA – 16, PROTIV – 0, SUZDRŽANIH – 0.

Predlažem sljedeći dnevni red sa ove dvije nove tačke:

1. Razmatranje Odluke o učešću u sufinansiranju izgradnje kuće Hasančević Samira iz Klokotnice
2. Razmatranje i usvajanje Izvještaja o radu JKP "Čisto" Doboj Istok za 2020. godinu
3. Razmatranje i usvajanje Izvještaja o radu JP Veterinarska stanica Doboj Istok za 2020. godinu
4. Razmatranje i usvajanje Informacije o radu Općinskog suda u Gračanici za 2020. godinu
5. Razmatranje i usvajanje Informacije o izvršenju budžeta općine Doboj Istok za period januar-mart 2021. godine
6. Razmatranje i usvajanje Programa obilježavanja 4. jula Dana brigade
7. Razmatranje zahtjeva Ministarstva finansija Tuzlanskog kantona za davanje mišljenja u vezi poslaničke inicijative poslanika Borisa Krešića postavljenoj na Skupštini Tuzlanskog kantona vezano za pokretanje procedure za donošenje dopuna Zakona o porezu na promet nepokretnosti i prava.

Dnevni red dajem na diskusiju ako ima neko nešto. Nema. Ko je za ovakav dnevni red?"
Glasanje: ZA – 16, PROTIV – 0, SUZDRŽANIH – 0.

REALIZACIJA DNEVNOG REDA

Ad. 1. Razmatranje i usvajanje Odluke o učešću u sufinansiranju izgradnje kuće Hasančević Samira iz Klokotnice.

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „ Jedno veliko hvala predlagачu Općinskom načelniku za ovakav gest. Naravno mi bi svi voljeli da toga nema, ali u ovom slučaju kako su naveli u razlozima za donošenje je itekako potrebno i ja pozivam vijećnike ako ima potrebe da se i mi na neki način odazovemo sa nekim našim dijelom paušala, ako ima potrebe u nekim daljnim radovima. Tako da kažem pozdravljam i želim da dam svoj doprinos ako je potrebno.“

Kemal Bratić, općinski načelnik: „ Ja ću samo kratko da pojasnim. Ovaj iznos sredstava koji ćemo mi dati iz budžeta neće biti dovoljan, ali razgovarao sam sa nekoliko naših privrednika koji su izrazili želju da učestvuju u finansiranju. Obratio sam se i jednom federalnom ministarstvu koji će takođe pokušati da iznađe način rješenja tako da učestvuje u sufinansiranju ili nabavci građevinskog materijala. Ono što je bitno istaći jeste da ćemo mi sa izgradnjom ove kuće u ovoj godini vjerovatno preći dvocifreni broj kada je riječ o izgradnji ovakvih objekata na području naše općine, što preko određenih stranih organizacija što evo našim akcijama i budžetima. Tako da je to za svaku pohvalu i ja bih bio sretan da takvih slučajeva nema i da se mi ne moramo uključivati, ali bi bio takođe sretan da makar po jedan ovakav objekat izgradimo svake godine. To naš budžet ne bi toliko osjetio, a napravili bi pored toga jednu lijepu gestu, a riješili bi jedan ključni problem. Kada se radi o ovoj porodici, oni koji ga ne poznaju, ja sam dužan da vas upoznam. Znači otac je dvoje djece, oženjen, demobilisani borac, imao je povredu na radu i teško radi, ali zarađuje i bori se za život. Moram vam reći da se nikada meni nije obratio za pomoć, a evo deveta godina mi je mandata, jer je čovjek takav, ide da radi i zarađuje i da privređuje. Nije od onih koji se bave demagogijom, popije gajbu pive i ništa ne rade po čitav dan, nego se bori i radi. Takvima treba pomagati i evo dvocifren broj će biti u ovoj godini. Tako smo slično uradili kuću Smajiću, mi smo dali, čini mi se, 15.000 KM, privrednici isto tako i evo završili smo i on hvala Bogu živi u svojoj kući, pa Kavazoviću, pa Hodžiću, pa Švaliću itd. Dobro je da pomažemo onima kojima je pomoć stvarno stvarno potrebna. Naš je plan da to realizujemo u roku od 3 mjeseca, a započeli bi radove u prvoj polovini juna, tako da planirano za 3 – 4 mjeseca ta naša porodica useli u novi objekat koji će biti adekvatan za življenje i stanovanje, pogotovo zato što imaju dvoje maloljetne djece. Ja ne sumnjam da će ova odluka dobiti veliku podršku. Moj

zadatak je da formiram komisiju koja će biti zadužena za praćenje i pomaganje u realizaciji projekta. Već su se neki privrednici javili sa određenim iznosima i građevinskim materijalom, tako da mislim da će ovaj projekat biti uspješan i da ćemo ga brzo realizovati.“

Selmin Karić, predsjedavajući Općinskog vijeća: „Ima li još prijavljenih? Nema. Zaključujem diskusiju. Ko je za usvajanje Odluke?“

Glasanje: ZA – 16, PROTIV – 0, SUZDRŽANIH – 0.

Ad. 2. Razmatranje i usvajanje Izvještaja o radu JKP "Čisto" Doboje Istok za 2020. godinu

Selmin Karić, predsjedavajući Općinskog vijeća: „Tačku dajem na diskusiju.“

Mehmed Mehinović, vijećnik SBiH: „Uvaženi predsjedavajući, dopredsjedavajući, kolegice i kolege, prisutni, eselamu alejkum i dobar dan. Možda ja ne mogu biti objektivan kada govorim o izvještaju JKP „Čisto“, međutim zato što cijenim tamo ljude koji rade taj posao nastojat ću da budem objektivan i da ukažem na neke stvari koje baš nisu dobre i da pohvalim ono što je dobro. Naravno, nekako sam ja rastao sa ovim komunalnim preduzećem od njegovog osnivanja, pa do današnjih dana i želim da odam, prije svega, priznanje svim uposlenim, pa i menadžmentu, koji rade i drže nam općinu čistom i održavaju vodovod onako kako ga održavaju. Zaista su zaslužili čestitke, ne samo od mene, nego i od svih nas, jer ja mislim da i vi dijelite moje mišljenje. Naime, kada govorimo o komunalnom preduzeću moje mišljenje je da oni svoju misiju ispunjavaju svake godine, a to se ogleda u tome da mi imamo isporuku vode, vodama kojim oni upravljaju, svakodnevno, kvalitetno i ne čekamo na popravku nekih kvarova dan dva, nego se to rješava u hodu. U tom dijelu mislim da se rijetko ko može pohvaliti, tako da i to govori o vrednoći i domaćinskom odnosu tih radnika koji rade na tim poslovima. Vizija možda još nije ispunjena, ali u zaključcima menadžment predlaže da se otprilike modernizuje preduzeće kako bi još bolje izvršavalo svoje obaveze. Želim takođe da odam priznanje onima koji su učestvovali u izradi ovog izvještaja za kvalitet, jer dugo nisam vidio ovako i kome bih god dao u ruke shvatio bi šta ima i razumio bi šta ima. Međutim, bilo je teških vremena u komunalnom preduzeću kada se bilo u velikim dugovima iz objektivnih razloga, ne iz subjektivnih. Šta je opasnost sadašnjeg komunalnog preduzeća bez obzira na dobit koja je iskazana ovdje i o čemu bi menadžment trebao povesti računa u narednom periodu, kao i osnivač, iako osnivač daje svestranu podršku a to se vidi u bilansu uspjeha? Za dobavljače obaveze se kreću otprilike oko 84.000, a potraživanja od kupaca otprilike oko 140.000 i sve je to opasnost, a imamo u sumnjivih i spornih 35.000. Komunalno preduzeće mora platiti PDV na ove isporučene fakture i vjerovatno moja je procjena ovdje da je ugrožena likvidnost komunalnog preduzeća, jer dosta nije naplaćeno. Po mojoj procjeni tako se prije kretalo, a zna to moj prijatelj Refik i da se vjerovatno oko 40% neće naplatiti potraživanja od 138.000 i to je već određena opasnost. Kako čujem menadžment upire svim snagama da pokuša naplatiti kako bi doveo sve to u red, međutim to bi u nekom narednom periodu mogla biti opasnost i treba im pomoći i preko pravobranioca i preko službi da se uključe što više i da se naplati što se može naplatiti. Evo da govorimo ljudima ovako kako govorimo da voda zaista nije skupa, pa možda i Centar za socijalni rad da se malo uključi da vide socijalne slučajeve koje imaju. Ja znam da ih ima, pa da se pokušaju u tom dijelu da se obezbijede neke pomoći kako bi platili vodu komunalnom preduzeću, jer znam da u ovih potraživanja od 138.000 dosta ima takvih ljudi. Ovo govorim iz razloga što im svima želim sve najbolje, a ovo preduzeće je potrebno općini zaista. Možemo se pohvaliti zimskim održavanjem, možemo se pohvaliti vodom, možemo čistoćom općine i prema tome iz tih razloga govorim da bi objektivno mogla biti, a 26.000 jest neki dobitak i čestitam im na tome, međutim oni su u opasnosti koje mogu uticati na preduzeće u nekom narednom periodu. Naravno da se i Služba za prostorno uređenje i urbanizam stave na raspolaganje i da pokušamo što više ljudi uključiti u odvoz ovog otpada. Mislim da su mjesne zajednice jako pasivne u tom dijelu, a i one se trebaju uključiti da građanima govore da potpišu te ugovore da bi popravili još bolje finansijsko stanje. Naravno to je zasluga

izvršne vlasti što je ovakva situacija, a zasluga je dijelom i nas vijećnika, jer donijeli smo odluku o poskupljenju vode i očito je to stabilizovalo neke stvari u komunalnom preduzeću. Međutim oni se moraju pozabaviti ovime o čemu sam ja pričao i ovo je dobronamjerno, ništa nije sporno, jer je samo na ovih 130.000 plaćeno je 22.100 KM PDV i onih 35.000 koja su sumnjiva i sporna potraživanja ona se vjerovatno neće nikako naplatiti i to će se morati kad tad otpisati. To će dovesti u situaciju i zato treba akumulirati ovaj dobitak i ne treba ga trošiti, da ga osnivač ne usmjerava negdje drugo nego da se pokriju ovo što će se otpisati. To su samo neke moje skromne sugestije kako bi bila još bolja situacija.“

Emira Karić, predsjednica kluba vijećnika SDP: „Možda nakon diskusije kolege Mehmeda ne bi trebalo više ni diskutovati, jer mi se čini da je otprilike sve rekao, ali požurit ću, jer zaista imam potrebu. Nastavit ću naravno i ja u afirmativnom tonu i reći da, kada je u pitanju urnek ovog izvještaja, je po meni rađen na jednom naučnom nivou i sadrži zaista mnoge elemente naučnog rada. To ne samo da je pohvalno, nego bi se moglo i zaviditi osobama ili osobi koja je sačinila ovakav izvještaj. Što se tiče tih nekih problema i ja ću se kratko zadržati, koliko sam shvatila, jer nisam prije u ovoliko sadržajnoj formi bila upoznata sa legalizacijom određenih stvari. Nisam znala da to nije sve tako legalizovano, ali na kraju krajeva izgleda da se sve mora prebaciti na mjesne zajednice. Opet ću se vratiti na izbore u mjesnim zajednicama, bar mjesne zajednice koje nisu donijele konačne liste da još jedanput obrate pažnju. Složit ću se sa diskusijama kolege Hasana sa prošlog vijeća da zaista obrate pažnju, jer imaju dosta posla u tim nekim narednim periodima i što se tiče legalizacije i što se tiče onoga o čemu je Mehmed govorio, a to je da natjeramo, mislim da to uopšte nije sporno i ne bi trebalo reći natjeramo, već da bi građani morali pristupiti odvozu smeća. Ja kažem kada bi savjet postavio logično pitanje građanima a gdje bacate konzerve? U redu reći će naš građanin da pali papir i slično, ali gdje baca ono što se ne može i to je jasno da se zaista mora pristupiti ozbiljno. Smatram da će tu najveći atak biti na mjesne zajednice i da će to sve ići u nekom afirmativnom smjeru. Takođe bih pohvalila prijedloge mjera i ja ću se osvrnuti na zadnji prijedlog mjera, a to je pod brojem 5. gdje kaže povećanje likvidnosti preduzeća sa značajnim projektima (ljetno održavanje puteva – o tome se često raspravlja po kafana i na slijelima itd., uređenje kanala, regulacija vodotoka i sl.) koje preko općine usmjeravati na preduzeće. Direktor i svi zaposleni u preduzeću svojim angažmanom da rade na obezbjeđenju ovakvih projekata i internim uštedama. Ovo je jako dobar prijedlog mjera koliko sam ja razumjela potrebna su određena sredstva da zaista općina bude tip top kada je u pitanju to održavanje lokalnih puteva, te neke šikare itd. Pokušajmo pomoći i načelniku da prebaci ta neka sredstva u nekoj većoj mjeri kako bi se te radnje i realizirale. Što se tiče prijedloga koji smo mi imali za cijenu vode vidite da to nije bilo toliko kod građana negativno. Mislim da po meni kada je u pitanju JKP „Čisto“ nije bilo tako ružnog eha, a koliko je pridonijelo preduzeću, tako da sam ja i u budućnosti za neko blago povećanje ako zaista djeluje na ovako dobar izvještaj i uvijek ću biti sa svojim klubom kao što sam bila i u prošlim vremenima. Žao mi je što nema direktora, ali vjerovatno će on u zapisniku ove stvari pročitati, jer mislim da svakom direktoru znače ako su afirmativne.“

Hasan Hasančević, predsjednik kluba vijećnika SDA: „ Uvaženi predsjedavajući, zamjeniče, kolege i kolegice, želim iskreno da vas pošaljam i pozdravim. Neću puno o izvještaju, jer je snabdijevanje vodom uredno, odvoz smeća uredan i prohodnost puteva u zimskom periodu uredna. Dolazimo do nekih stvari o kojima trebamo voditi računa u budućnosti o kanalizaciji i složio bih se sa svim diskusijama u vezi rada savjeta mjesnih zajednica. Odgovorno tvrdim da savjeti budu ažurniji najmanje 20 % građana još bi potpisalo ugovore za odvoz smeća. Kroz razgovor sa načelnikom, sa službom, sa pravobraniteljicom i komunalnim preduzećem došli smo do jednog zaključka da pravobraniteljica šalje opomene za potpisivanje ugovora, odnosno nepotpisivanje ugovora. To je jedna pravna klauzula i forma koja bi trebala u narednom periodu piti vode, da tako kažem. Sa tim opomenama se već krenulo od skora i neki su već prihvatili to i potpisali. Onaj ko ne bude prihvatio opomenu koju je poslala pravobraniteljica ona će jednu grupu takvih zvati telefonski i upućivati prema sudu i to ne bi imalo obavezu komunalno

preduzeće. To je trenutno takva odluka koju su našli naši pravници i vidjet ćemo u ovoj godini koliko će ona piti vode. Mislim da hoće kada 10% na osnovu toga pristupi potpisivanju odvoza smeća. Nije odvoz smeća samo u finansijskom smislu poboljšanje za komunalno preduzeće već i za našu sredinu koja je takva kakva jest i koju treba sačuvati. Svi mi treba da radimo na tome da kanalizaciju u svojim mjesnim zajednicama pokušamo što prije staviti u neku izgradnju ili neku legalizaciju, kako hoćete. Mi znamo svi da ni u Gračanici nema kolektora, znamo da nema ni u Lukavcu kolektora i možda 3 – 4 grada u BiH, ali stavlja se prepreka u onom dijelu gdje je završena kanalizacija gdje bi mogao ići određeni kolektor, pa u Spreču. Nije legalno da se priključi i da se iz toga izvlače neka sredstva prema komunalnom preduzeću da bi se dalje širila kanalizacija. Znači to su stvari na kojima treba raditi i menadžment i Općina i mi kao Vijeće da damo podršku, pa čak ako bude potrebno nekim kreditnim zaduženjima, ni od toga ne treba bježati. Imali smo nekada, ako se sjećate u prošlim sazivima, priliku za tim i propustili, nije bitno, jest bitno, ali ovo što trebamo uraditi to je gorući problem. Radim na takvim poslovima i znam šta je u pitanju i mogli bi na osnovu nekih dosadašnjih radnji uključiti, po meni, 500 – 800 domaćinstava koji bi regularno plaćali te stvari i iz toga bi se crpila nova sredstva. Evo to stoji na menadžmentu da to pokuša uraditi naravno sa mjesnim zajednicama, opet potenciram. Ja živim u podružnici Polje i nisam znao dok nisam počeo raditi ovdje da nekih 100 kuća nije plaćalo smeće dole, pa možete zamisliti, kao što kolegica Emira reče, kuda ga je šnjiro i dokle. Tako da mi u tom dijelu možemo, ja ga znam, ne plaća smeće, ima da plaćaš smeće. Kada mi sebi svi svedemo na neku računicu da se trebamo upozoravati između sebe bit će dobro. Znači izvještaj je ok i samo treba još raditi na ovim stvarima.“

Selmin Karić, predsjedavajući Općinskog vijeća: „Ja moram zaista pohvaliti izvještaj i po mom mišljenju rezultat je odličan. Znači dobit od 27.000, a pročitali ste tamo da gubici na vodovodnim mrežama dostižu čak i do 40% i kada uzmete u obzir da veliki broj domaćinstava nije uključen u odvoz otpada, ovaj rezultat je odličan. Kada bi ove gubitke preračunali u nekakve finansije dobit bi bila puno puno veća. Imate za prošlu 2020. godinu isporučeno više 66.700 kubika u odnosu na 2019. godinu vode, a fakturisano je samo 22.400 kubika, pa sada uzmite kolika je tu razlika. Znači treba u budućnosti dosta pažnje posvetiti tim gubicima. Koliko ja znam oni su već poduzeli nekakve mjere i da su ti gubici dosta smanjeni. Takođe kao što je kolega Mehinović spomenuo veliki je broj nenaplaćenih faktura, što znači da je ono što je fakturisano nije naplaćeno i moja sugestija je da možda ono što oni zasigurno znaju da neće naplatiti da otpisuju sukcesivno da ne bi došli u situaciju nelikvidnosti što bi moglo ugroziti poslovanje. Zahvaljujem se i samo naprijed. Ima li još diskutanata? Nema. Zaključujem diskusiju i dajem tačku na izjašnjavanje. Ko je za usvajanje Izvještaja o radu JKP „ČISTO“ d.o.o. Doboj Istok za 2020. godinu?“

Glasanje: ZA – 16, PROTIV – 0, SUZDRŽANIH – 0.

Ad.3. Razmatranje i usvajanje Izvještaja o radu JP Veterinarska stanica Doboj Istok za 2020. godinu

Selmin Karić, predsjedavajući Općinskog vijeća: „Tačku dajem na diskusiju“.

Emira Karić, predsjednica kluba vijećnika SDP: „Da je bilo boljih izvještaja, bilo je, a vjerovatno se Hasan sjeća, ali ovo je jedan od najšturijih izvještaja. Ja ću pričati istinu i samo istinu, ali moj klub će ga prihvatiti zato što su ga prihvatili članovi Nadzornog odbora, pa da kažemo da im povjerujemo i naravno ne sa sva tri glasa za, ali je prihvaćen od strane Nadzornog odbora. Ovdje bi se moglo govoriti o jednoj drugoj problematici. Ja se sjećam da je direktor unazad nekoliko godina itekako apelirao na pojavu smanjenja stočnog fonda. Sada je ovo već po ovoj statistici došlo na jednu crnu tačku. Budžet je takav kakav je za 2021. godinu i u 2022. godini hajmo se pogledati u oči i zaista na tom polju nešto ozbiljno ozbiljno raditi. Ja opet kažem moramo priznati mi smo jedna ruralna sredina i mislim da nam je taj stočni fond itekako bitan u svim daljnim periodima. Tako da kažem izvještaj ćemo prihvatiti, ali da može bolje, može.“

Hasan Hasančević, predsjednik kluba vijećnika SDA: „Kada imamo izvještaje službe za poljoprivredu ili referenta očito ne upoređujemo stočni fond sa izvještajem Veterinarske stanice, pa ili Veterinarska stanica ne vrši radnje kod naših stočara, odnosno naših proizvođača da li junaca ili mlijeka itd. jer neke stvari se ne slažu. Jedna služba tvrdi da imamo više muznih grla nego ikad, da imamo više tovljenih junaca nego ikad, a kada pročitamo izvještaj Veterinarske stanice to je katastrofa. Ja sam se malo potrudio i pitao i došao do sljedećeg da naša Veterinarska stanica ne vrši opsluživanje naših poljoprivrednih proizvođača u smislu da im oni pružaju usluge ili ne vrše kod velikih proizvođača. Zašto je to tako, ja ne bih ulazio u to, ali ovo što je ovdje napisano nije tačno. Ne mogu ja dobiti podatak iz Tekučice iz Osječana iz Boljanića, jer to me ne interesuje. Mene interesuje općina Doboј Istok i šta je ovdje. Ovdje piše direktor preduzeća v.d. Mustafić Jusuf i što kolegica Emira reče i ne bih o tome, ali svi danas mogu napraviti izvještaj top, niko nije nepismen, jer svi koriste internetske mreže i mogu prepisati i ubaciti svoje podatke i to je to. Ovo je jedan vid nepoštivanja Općinskog vijeća i nas kao vijećnika. Ja ne bih ulazio u tu saradnju sa nekim organima unutar općine, njegovu, znači direktorovu, ne preduzeća, jer ostali radnici kada pričamo sa njima su na dispoziciji za razgovore i za komunikaciju. Klub vijećnika SDA neće podržati ovakav izvještaj i ja predlažem da se on vrati na doradu i da ne dolazi dok se ili imenuje novi direktor ili dok taj dotični koji je v.d. po ne znam čemu, vi znate da ja uopšte nisam raspravljao određen broj godina po ovim pitanjima. Nema potrebe da raspravljamo, neka menadžment uradi šta treba da uradi i neka nam ovdje dostavi novi izvještaj sa novim podacima. Ja sam kazao na početku da sam se potrudio da provjerim koji je broj stoke i grla i ovo ovdje se ne slaže, ovo što je ovdje napisano se ne slaže.“

Selmin Karić, predsjedavajući Općinskog vijeća: „Ja sam i prošle godine, a i sada ću reći da se potpuno slažem sa kolegom Hasanom. Znači apsolutno ne stoji da je evidentan pad stočarstva. Možda ima nekakva tendencija pada, ali da je evidentan pad, apsolutno nije. Mi imamo proizvođača koji ima 70 muznih grla i oko 100 i nešto junadi u tovu. To što naše preduzeće ne opslužuje takve, to je stvar menadžmenta i njihovog odnosa vjerovatno. Na tržištu ste i morate se boriti za kupce, je li tako? Znači ovo apsolutno po mom mišljenju ne stoji i ono što ja imam informacija da je tako. Znači ako je broj usluga smanjen to ne znači da je i stočni fond smanjen. Kada je u pitanju finansijski dio 8.000 gubitka na 80.000 prihoda je, po meni, previše. Ono što smo dobili uz ovaj izvještaj je i bruto bilans nekakav koji, kao što vidite, nije ni potpisan. Druga stvar ono što stoji u narativnom dijelu, apsolutno ne vidim ovdje u bruto bilansu. Znači gubitak od 8.000 ja ne vidim ovdje. Ono što vidim, a složiti će se i kolega Mehinović, je da imamo istovremeno konta 3410 neraspoređena dobit izvještajne godine 64.787, 98, a u isto vrijeme imamo 3510 konto gubitak izvještajne godine 19.591, 21. Mislim da je ovo prvo nemoguće i ne može ovako da stoji, jer jedne strane postoji mogućnost da je ovo bruto bilans prije rasporeda gubitka, ali bez obzira ako je to ne možete imati istovremeno i neraspoređenu dobit izvještajne godine i neraspoređeni gubitak izvještajne godine. Tako da ja apsolutno u tom kontekstu ne mogu podržati ovaj izvještaj.“

Emira Karić, predsjednica kluba vijećnika SDP: „Ja sam samo htjela da kažem da ne mogu da povjerujem da, a riječ je o ozbiljnoj osobi, v.d. direktor po meni je ozbiljna osoba, on vrši neku analizu na osnovu broja pregleda. Ja mislim da Veterinarska stanica, a jedino da tražimo od nekog tačan broj, ali mislim da se on ne bi usudio nama ovo prezentirati na osnovu broja pregleda. Ja tvrdim da to nije tako.“

Kemal Skopljak, vijećnik BPS Sefer Halilović: „Svaki puta dolazimo u istu situaciju kada je rasprava o našoj Veterinarskoj stanici i koliko sam ja ovdje, evo peta godina uvijek je isto stanje. Osnivač smo mi, je li tako? Općina i ako imamo problema, a očito imamo problema sa odnosom i odnosima između menadžmenta i nas, trebalo bi pristupiti rješavanju tih odnosa. Ovdje nije sporno ništa, izvještaj kao izvještaj može se napraviti i ovakav i onakav, može se uljepšati i može se pogoršati, naravno. Ovdje suštinski problem jeste odnos i znači naš odnos moramo

promijeniti. Ako nismo zadovoljni oborit ćemo izvještaj, zamijenit ćemo menadžera ili menadžment te naše Veterinarske stanice i riješiti problem jednom za sva vremena. Ovako svaki puta se ponavlja i iz godine i godinu i uvijek taj problem imamo. Predlažem da na tom fonu pokušamo nešto uraditi.“

Hasan Hasančević, predsjednik kluba vijećnika SDA: „ Složio bih se sa kolegom Kemom 100%. Koliko je on ozbiljna osoba, uvažena kolegica Emira se sjeća kada je on pisao nama i kada je htio na godišnji odmor, a mi njega zvali da dođe ovdje, pa eto maltene poslali mu taksu lambordini da ga doveze ovdje, da ga vidimo, poželili ga kao vijećnici. Koliko je to nepoštvanje kada dobije unaprijed sve i evo sada za vašu informaciju poslao je mejl kako se ne slaže što neće biti prisutan. Možete li zamisliti koje su to kontradiktornosti šta čovjek radi i omaložava nas. Ja sam rekao složio bih se sa Kemom u potpunosti ako nemamo direktora raspiši konkurs i doći će direktor, šta je sporno, koji će uvažavati Vijeće i osnivača u dijelu u kojem treba. Ne treba on nikome polagati račune, jer ima inspekcije, ima on raznorazne stvari, ali onoliko koliko treba da poštuje ovu instituciju morat će poštovati. Ne samo on nego bilo koji drugi direktor. Mene ne interesuje njegova stranačka pripadnost ili nepripadnost, apsolutno me ne sikira to, ali kada pričamo sa ljudima kome se vrše usluge i porazgovarajte, pa ćete vidjeti, da ne iznosimo za govornicom neke stvari. Znači on je neozbiljna osoba sa moje lične strane, a evo i svi znamo da je neozbiljna osoba.“

Selmin Karić, predsjedavajući Općinskog vijeća: „Ima li još prijavljenih? Nema. Zaključujem diskusiju. Ko je za usvajanje Izvještaja o radu JP Veterinarska stanica d.o.o. Doboj Istok za 2020. godinu?

*Glasanje: ZA – 5, PROTIV – 11, SUZDRŽANIH – 0.
Izvještaj nije dobio potrebnu većinu.“*

Ad.4. Razmatranje i usvajanje Informacije o radu Općinskog suda u Gračanici za 2020. godinu

Selmin Karić, predsjedavajući Općinskog vijeća: „Tačku dajem na diskusiju.“

Hasan Hasančević, predsjednik kluba vijećnika SDA: „Ne mogu a da ne iskažem zahvalnost Općinskom sudu u Gračanici u smislu rješavanja stvari koje su navedene ovdje, a pogotovo ZK uredu koji saraduje sa općinom Doboj Istok, odnosno sa katastrom općine Doboj Istok. Saradnja je više nego odlična.“

Selmin Karić, predsjedavajući Općinskog vijeća: „Ja kao i svake godine obzirom da sam često u kontaktu sa ZK uredom iz raznoraznih razloga mogu reći da rade odličan posao, vjerujte mi. Naročito kada su u pitanju privredni subjekti vjerujte da uvijek izlaze u susret, naravno onoliko koliko mogu. Kada su u pitanju upisi i izmjene u zemljišnim knjigama, vjerujte da to ide izuzetno brzo i kada su u pitanju razni upisi i tereti itd. svaka pohvala. Kada je u pitanju ostali dio Suda obzirom, kao što smo vidjeli ovdje, na ostvarenu kolektivnu normu Suda od 87%, te kvalitetom rada od 84,02 %, takođe smanjenim brojem starih predmeta, a imajući u vidu da im nedostaje određeni broj sudija i namještenika sve pohvale i ja se nadam da ćemo ovu informaciju jednoglasno prihvatiti.“

Emira Karić, predsjednica kluba vijećnika SDP: „Kada je u pitanju upravo taj ZK dio ja se ne bih oglašavala, ali evo ipak sam odlučila. Ne želim pohvale dok ne dobijem crno na bijelo spornosti oko dijela zemljišta koje pripada školi, a sada dobili smo katastar da pripada općini Doboj Istok. Dok se to ne dotjera mak na konac i ako budu u pravu ja ih pohvaljujem, a ako ne po meni onda i nisu za pohvale.“

Selmin Karić, predsjedavajući Općinskog vijeća: „Ima li još prijavljenih? Nema. Dajem na usvajanje Informaciju o radu Općinskog suda u Gračanici za 2020. godinu. Ko je za?

Glasanje: ZA – 13, PROTIV – 0, SUZDRŽANIH – 3.

Informacija je dobila potrebnu većinu.“

Ad.5. Razmatranje i usvajanje Informacije o izvršenju budžeta općine Doboj Istok za period januar-mart 2021. godine

Selmin Karić, predsjedavajući Općinskog vijeća: „Ja ću iznijeti stav Komisije. Iz priloženog dokumenta može se reći da su prihodi sa 24,93% izvršenja, odnosno 914.999,95 KM, pratili rashode 22 % izvršenja, odnosno 805.027,35 KM sa razlikom od 2,93%, što je u granicama neke tolerancije i može se reći da je budžet realno planiran. Iz informacije je vidljivo da su prihodi od direktnih poreza nešto veći, a to je zbog toga što se porez na dohodak po konačnom obračunu za prethodnu godinu plaća u prvom kvartalu tekuće godine isto kao i općinske komunalne takse. Indirektni porezi sa 23,81 % izvršenja su dosta dobri i dobro su proicirani te su oni realni pokazatelji izvršenja budžeta za ovaj period. Kada su u pitanju rashodi na platama oni su pratili plan sa 23% izvršenja, a i ostali rashodi su u većoj ili manjoj mjeri pratili plan budžeta za 2021. godinu. Komisija je prihvatila Informaciju i predlaže Općinskom vijeću da istu usvoji.“

Emira Karić, predsjednica kluba vijećnika SDP: „Pričali smo o urnecima određenih izvještaja, u ovom slučaju je dakle informacija, koji dostižu recimo naučni nivo. Ja sam iskreno očekivala odgovor na moja vijećnička pitanja kada su u pitanju razjašnjenja određenih konta budžeta. Ja nisam dobila odgovor na vijećničko pitanje tako da ću i dalje biti stava kada je u pitanju budžet općine Doboj Istok da budem protiv.“

Mehmed Mehinović, vijećnik SBiH: „Predsjedavajući, bit ću nevjerovatno kratak po ovom pitanju i samo ću jednostavno iz profesionalne situacije da prokomentarišem neke stvari. Kada govorimo o informaciji i kvalitetu stvarno zadovoljava ovo o čemu je predsjedavajući pričao i predsjednik komisije stvarno zadovoljava sa 24 i nešto u ovako nestabilno vrijeme sa tim prihodima u budžetu je stvarno odlično. Moje čestitke, jer tako ide. Ovdje ima nekih prihoda koji se u prvom kvartalu naplaćuju i neće ih biti kasnije, ali ima i nekih troškova koji budu u prvom kvartalu, a ne budu kasnije i tako se to otprilike potire. Međutim kada se govori o kvantitetu to je moje već četiri, pet i šest godina da se ne slažem otprilike sa ovim, jer i dalje mislim da je trebalo pojasniti sa dvije tri rečenice iz čega je nastao ovaj 109 višak. Ja znam otprilike, jer vidio sam u izvještaju, vjerovatno a ne mora značiti da je to tačno. Moja je procjena da je to vjerovatno od nepotrošenih namjenskih sredstava, međutim po meni je trebalo objasniti konto 613991 ostali troškovi sa 161% ispunjeni, konto 614515 sa 244% ispunjeni. Makar objasniti, a neću reći da to nije trebalo biti ovako, ali da znam da sebe sam ne preispitujem je li to moralo tako biti i zašto je tako itd. Da ima bar dvije rečenice ja bih za ovu informaciju glasao.“

Selmin Karić, predsjedavajući Općinskog vijeća: „Ima li još prijavljenih? Nema. Informaciju dajem na glasanje. Ko je za usvajanje Informacije o izvršenju budžeta općine Doboj Istok za period januar-mart za 2021. godinu?

Glasanje: ZA – 11, PROTIV – 0, SUZDRŽANIH – 5.

Informacija je dobila potrebnu većinu.“

Ad.6. Razmatranje i usvajanje Programa obilježavanja 4. jula Dana brigade

Selmin Karić, predsjedavajući Općinskog vijeća: „Tačku dajem na diskusiju.“

Emira Karić, predsjednica kluba vijećnika SDP: „Ono što uveseljava moje srce je kada vidim da se određene manifestacije, odnosno direktan datum određene manifestacije proteže kroz jedan duži period što imamo u slučaju ovog našeg vrlo bitnog datuma 4. jula Dana brigade. Drago mi je

što će učenici svih škola imati ponovo priliku da svojim literarnim radovima i nas dalje inspirišu i uvesele. Svaka pohvala našem ovlaštenom šefu službe Admiru Šišiću i drago mi je da se ovo ovako raširilo i nadam se da će se ovo moći po ovom načinu da realizuje.“

Kemal Bratić, općinski načelnik: „Ovdje skup penzionera umjesto juni – juli.“

Selmin Karić, predsjedavajući Općinskog vijeća: „Zahvaljujem se načelniku na sugestiji. Ima li još prijavljenih? Nema. Ko je za usvajanje Programa obilježavanja 4. jula Dana brigade?“

Glasanje: ZA – 16, PROTIV – 0, SUZDRŽANIH – 0.

Ad.7. Razmatranje Zahtjeva Ministarstva finansija Tuzlanskog kantona za davanje mišljenja u vezi poslaničke inicijative poslanika Borisa Krešića postavljenoj na Skupštini Tuzlanskog kantona vezano za pokretanje procedure za donošenje dopuna Zakona o porezu na promet nepokretnosti i prava.

Selmin Karić, predsjedavajući Općinskog vijeća: „Tačku dajem na diskusiju.“

Hasan Hasančević, predsjednik kluba vijećnika SDA: „Pošto se od nas traži mišljenje koje može biti, ali i ne biti, malo me iritira ovo vanbračni parovi. Populacija koja glasa za mene i ovakve kao ja ne poznaje to i nije mi to nešto vanbračni par, malo me to vrijeđa. Možda to nije namjera Ministarstva finansija, ali ovdje nije obrazloženo šta ni koliko, pod kojim uslovima. Ne može biti bračni i vanbračni par nikada isto. U finansijsku situaciju ulazio ili ne ulazio ja odgovorno tvrdim nije niti će ikada biti isto. Znači mi treba da podržavamo širenje nečega što u životu ne praktikujemo i to je meni malo van svake pameti. Samo sam zato izašao ovdje da ne bude da neko nešto prećuti. Uvaženi Borise Krešiću imaš Skupštinu donesi odluku, ti stojiš iza toga i alahimanet i doviđenja, nemamo šta raspravljati. O finansijama i taj dio smo mi razmatrali i nije to ništa sporno. Ovo je vrijeđanje, ne znam više čega.“

Kemal Bratić, općinski načelnik: „Prije svega da se izvinem što sam bio odsutan, imao sam goste vezano za projekat ovdje od semafora da usaglasimo o određenim stvarima. Neću diskutovati kao moj prethodnik nego ću o tome da sam razmišljao ko je bračni, a ko vanbračni, a to je svačiji izbor kako će se ko zvati. Međutim bojim se ako mi podržimo ovako i još nekoliko općina, pa se to sutra usvoji moglo bi doći do zloupotreba. Znači čime neko dokazuje da je vanbračni par? Ko je vanbračni par? Šta je status vanbračnog para? Ja ću se rukovoditi onim formalno pravnim stvarima da jednostavno dvoje se nađu na putu i hajmo mi biti vanbračni par dok tu stvar ne riješimo. To je ključni problem ovoga, nije ključni problem ko za koga glasa i ko je bračni, a ko je vanbračni par. Po meni je u ovom isključivo problem ko će to kontrolisati i ko će dokazati, a na kraju krajeva ima li nekakav urnek za vanbračne parove? Ja koliko znam nema, a ovamo za bračne ima, jer ako se neko vjenča dobije onaj papir i ne zove se džaba bračni par. Tako da ću ja iznijeti svoje lično mišljenje da ja nisam za ovakvu inicijativu iz ovih razloga. Ne da nekome ne bi pomogli, nego isključivo iz ovih razloga, jer čime to nama neko dokazuje da je vanbračni par. Po meni može se desiti da dva ista pola budu vanbračni par, pa da traže, jer nažalost takva je ova inicijativa.“

Emira Karić, predsjednica kluba vijećnika SDP: „Ako se dubiozno shvati ova inicijativa onda ćemo ovdje raspravljati o diskriminaciji. Ova inicijativa sprečava diskriminaciju i ja sam protiv svakog vida diskriminacije. Evo imala sam sreću da za vikend pohađam jedan seminar i ekspert za diskriminaciju mi je zaista pojasnio neke stvari. Ne bi vjerovali u šta mi idemo i analiziramo šta je diskriminacija, a šta nije diskriminacija itd. Ovdje čak imamo i rečenicu – Ustavni sud Bosne i Hercegovine u predmetu taj i taj uvodi da razlika u postupanju bit će diskriminaciona ako za nju ne postoji objektivno i razumno opravdanje. Ja mislim da ovdje ne postoji razumno opravdanje da bi se dovodilo u razliku. Ja ću vama ako mi dozvolite, a imam po Poslovniku 5 minuta, nije diskriminatorno ako se muški i ženski pol prijave na konkurs za policijsku

akademiju, pa tamo piše u tim nekim tjelesnim aktivnostima muškarci istrče toliko i toliko metara za 25 sekundi, a ženama je dozvoljeno za 35 sekundi. Znači tu se ne radi o diskriminaciji, jer to je jednostavno tako kako je. Ovdje se radi o diskriminaciji i mi ne možemo ako ima zakon o vanbračnoj zajednici ovdje raspravljati šta je vanbračna zajednica. Zakon je regulisao šta je vanbračna zajednica i vjerovatno te dvije osobe moraju se nalaziti na istoj adresi, moraju pisma dolaziti na tu adresu, moraju nešto što je zakon regulisao. Znači svi možemo pročitati taj zakon o vanbračnoj zajednici i on je čest primjer na zapadu, mi to nismo ovdje izmislili. Da li će biti kod nas, ne znam i ja sam da se to nešto ozvaniči građanski i za tu sam formu, ali imaju ljudi koji se samo šerijatski uzmu, ne građanski. Ima i takvih brakova, dovoljno im je da polažu pred Bogom, odnosno pred dragim Alahom i to je nešto i ja zaista ne bih ulazila u ovakve diskusije. Na kraju krajeva ako ćemo može i bračni par ovo da iskoristi, odnosno da se dvoje uzmu, pa se rastave nakon te neke imovine, a šta će im po zakonu sledovati to ne znam. Smatram zaista da se ovdje radi, a ne želim uvjeravati nikoga, o diskriminaciji i smatram da i u nekim drugim zakonima ako stoji samo bračna da bi trebalo dodati i vanbračna zajednica.“

Selmin Karić, predsjedavajući Općinskog vijeća: „Ja sam htio samo da usmjerim diskusiju obzirom da od nas Ministarstvo finansija traži mišljenje, a ne neko drugo ministarstvo, tako da u tom pravcu diskutujemo.“

Mehmed Mehinović, vijećnik SBiH: „S obzirom da i ja pripadam grupi staromodnih koji tako razmišljaju i sam sam postavio pitanje. Nisu mi neki znali odgovoriti i nisam ja sam sebi znao odgovoriti ko će to, jer to je oslobađanje ako je 200.000 stan, 20.000 i to se vodi državnih para i nešto, pa me interesuje kako će se dokazivati otprilike to. Međutim sve pada u vodu, ja sam pročitao i uzмите pa pročitajte i ima pravo glasati kako ko hoće, Porodični zakon Federacije Bosne i Hercegovine od 2005. godine. Jutros sam se konsultovao sa jednim pravnikom koji to zna i član 5. jasno govori šta čini vanbračnu zajednicu. Znači zakonom je regulisano da je čine muškarac i žena i smatra se ako tri godine žive zajedno, a to dokazuju svojom izjavom da žive zajedno i dobiju kućnu listu. Može li to biti zloupotrijebljeno ili ne može, ali može i manje od tri godine ako imaju dijete. Takođe to legalizuje Zakon o nasljeđivanju član 4. članovi vanbračne zajednice ako se dokaže nasljeđuje kao i u bračnoj zajednici to. Prema tome isto sam mislio kao i svi diskutanti da je to da se to društvene pare harče, da se tako izrazim, i da moramo tražiti kako se to dokazuje, a evo dokazuje se po zakonu, jer to je zakon regulisao i ne znam što traže od nas.“

Selmin Karić, predsjedavajući Općinskog vijeća: „Ja mislim da smo otišli u pogrešnom smjeru. Mi ne raspravljamo ovdje o diskriminaciji, nego Ministarstvo finansija traži naše mišljenje vezano za eventualni uticaj na naš budžet. Mi apsolutno nemamo nikakvih egzatnih podataka ni koliko ima tih brakova, ni da li ima, ni da li će to uticati na naš budžet i mi to ne možemo prihvatiti. U tom kontekstu govorim. Znači apsolutno ne raspravljamo o diskriminaciji, jer Ministarstvo finansija od nas traži mišljenje, ako ste čitali, a mislim da jeste.“

Izet Hodžić, zamjenik predsjedavajućeg Općinskog vijeća: „Poštovani predsjedavajući, kolege vijećnici i vijećnice, uvaženi načelnice bez saradnika, predstavnici medija evo prvi put se javljam i želim iskreno da vas poselmim i pozdravim. Predsjedavajući je malo prepisivao od mene ovo što je rekao. Znači ništa novo i ništa naročito, raspravljali smo na našem klubu o ovoj tački dnevnog reda. Ministarstvo finansija traži od svakog općinskog vijeća da da svoje mišljenje i da se vodi rasprava po ovoj tački dnevnog reda pošto su to izričito prihodi lokalnih zajednica, odnosno općina i gradova u Tuzlanskom kantonu. Znači u 100% kapacitetu i ako oslobodimo bilo koju kategoriju ne možemo računati na te predviđene prihode u općinskom budžetu. Kolega Mehinović je nama parafrazirao definiciju vanbračne zajednice i to sve otprilike stoji, međutim ovdje bi se išlo sa izmjenom zakona, a prilikom donošenja naše odluke mi možemo da stavimo koje mi populacije oslobađamo. Ovdje se kaže za donošenje dopune Zakona o porezu na promet nepokretnosti i prava i da li sam u pravu ili nisam, ali slažemo se, jer smo na klubu većine vodili dugo diskusiju po ovoj tački dnevnog reda i ima dosta ovdje nedorečenih stvari. Hajmo mi

kvalitetno sprovoditi ovu odluku i ovo što je trenutno na snazi da bračnim parovima mlađim od 35 godina omogućimo da koriste ove subvencije i ova prava. Što god bi čovjek rekao na ovo da li je diskriminacija ili nije, ali ako kao bračni par žive 3 godine skupa ne vidim razloga zašto ne bi to i ozvaničili pred zakonom, pred institucijama države Bosne i Hercegovine. Može mi neko zamjeriti uopšte nije problem, a možemo otići u nedogled, ali koje su obaveze bračnog para prema društvu, prema zajednici i da li oni imaju iste obaveze. Mi pričamo o pravima, ali da li imaju iste obaveze prema društvu, prema lokalnoj zajednici, prema državi, prema kantonu, prema Federaciji i svima ostalim. Tu su možda u podređenom položaju bračni parovi koji su registrovani, koji su se vjenčali u općini i u Islamskoj vjerskoj zajednici. Znači govorimo samo o jednom aspektu o pravima o povlaštenim stvarima, a ne govorimo o obavezama.“

Emira Karić, predsjednica kluba vijećnika SDP: „Ja opet moram reći sa svog aspekta ne slažem se ni sa jednim ovim diskutantom osim što je vijećnik Mehmed išao u tom dobrom smjeru. Mi ovdje govorimo da Ministarstvo finansija traži od općinskog vijeća, jer će to koštati budžet općine. Šta traži? Traži da se izjasnimo da li će se kod riječi bračni dodati i riječ vanbračni. Ako prihvatimo da se doda vanbračni, znači prihvatamo da će to na neki način koštati budžet općine, a rečeno je da takvih zajednica nema puno. Znači ovdje se zaista radi o diskriminaciji i nije džaba ovdje rečeno da Ustavni sud Bosne i Hercegovine to i to. Smatram da je Krešić, naš poslanik, samo htio da vanbračnu zajednicu izjednači sa bračnom pošto je ona izjednačena u postojećem zakonu. Mi ovdje nećemo kreirati zakon, jedino ako hoćete da podnesete neku inicijativu da se mijenja zakon taj, pa da općina tretira bračnu zajednicu i to se može predložiti, nije problem. Mi govorimo o nečemu što već postoji, Porodični zakon postoji, postoje riječi bračna zajednica, postoje riječi vanbračna zajednica i mi ovdje samo možemo razgovarati da li ćemo prihvatiti inicijativu poslanika Krešića da se ne dovodimo u diskriminacionu formu. To je po meni shvaćeno tako i zato sam ja govorila o diskriminaciji. Zaista ako kažeš bračna, a vanbračna ima isti status po zakonu, onda je to diskriminacija. Ja mislim da bi mogli dobiti na sudu.“

Selmin Karić, predsjedavajući Općinskog vijeća: „Ako se to podrazumijeva, onda ne znam šta će im naše mišljenje. Govorim o tome da se mi izjašnjavamo po zahtjevu Ministarstva finansija.“

Hasan Hasančević, predsjednik kluba vijećnika SDA: „Očito me niste dobro razumjeli. Znači ja predlažem da se ne usvoji inicijativa, da mi ne budemo za inicijativu Borisa Krešića da ispred bračni dodamo i vanbračni. Samim tim davanjem vanbračni dajemo prednost nekome na nečemu. Ne postoji vanbračni Emira, da postoji van ne bi mi raspravljali. Postoji bračni i vi imate pravo da tvrdite jedno, a mi da tvrdimo drugo. Mene pare u ovom slučaju ne interesuju, hoćemo li biti oštećeni ili nećemo, ja sam to rekao i na klubu. Predlažem da ne usvojimo mišljenje i alahimanet i doviđenja.“

Izet Hodžić, zamjenik predsjedavajućeg Općinskog vijeća: „Emirina diskusija ok, ima svako pravo, ali ja ne vidim zašto Skupština Tuzlanskog kantona kada je usvajala ovakav zakon, a imala je pred sobom Porodični zakon i tamo je stajalo bračna – vanbračna zajednica. Znači zašto tada nije usvojila isti taj zakon, jer Porodični zakon je rekao bračni parovi i vanbračni parovi. Znači kada je usvajan zakon o oslobađanju bračnih parova zašto je to sada retroaktivno i zašto tada nije usvojeno. Znači i tada bio na snazi ovaj zakon i materija koja je to regulisala. Ne vidim razlog zašto se sada odjedanput neko sjetio, pokupio dodatnu pamet da bi izašao sa skupštinskim prijedlogom i inicijativom u Skupštini kantona. Znači kada je donošen zakon o oslobađanju bračnih zašto nije išlo kada je obuhvaćena Porodičnim zakonom i jedna i druga kategorija. Znači tada je pravljena diskriminacija, ako govorimo o diskriminaciji.“

Kemal Bratić, općinski načelnik: „Dobro je da diskutujemo, ali nije dobro da gubimo vrijeme bespotrebno. Moje mišljenje je da će Skupština to usvojiti ili ne usvojiti kako god da mi mišljenje dali po tome. Ja ovdje razmišljam evo roditelj sam i muškog i ženskog djeteta. Da li bi ja svoje dijete nagovarao da ono živi u vanbračnoj zajednici? Da li bi neko od vas to uradio i volio da tako

bude? Ja o tome debelo razmišljam. Nisam protiv toga neka živi ko kako hoće, gdje hoće i sa kim hoće. Demokratija je i ljudi imaju pravo na to, ali da li mi šaljemo dobru poruku? Postoji Porodični zakon, postoje pravila i postoje procedure. Ja koliko znam kod nas nema ni jedne takve zajednice prijavljene, što neko reče da se prijave. Šta mi da radimo? Evo uvaženi poslanik Boris Krešić i dobro ga znam, mi na taj način izjednačavamo bračnu i vanbračnu zajednicu i to je jedan mali korak još. Ja nisam za to i neću biti nikada. Ne bih glasao ni za taj zakon, kakva bolan vanbračna zajednica. Mi uzimamo sa zapada sve ono što ne valja. Dajte da uzimamo neke druge stvari, bolje stvari i da idemo u tom pravcu. Ja isključivo iz moralnih razloga nisam za ovakvu stvar. Neće oštetiti naš budžet, jer koliko ja znam nema takvih zajednica, a možda i ima, može me neko demantovati. Znači šaljemo ružnu poruku, jer ovakva zajednica, a znamo ko je na neki način većina i nije to diskriminacija, nego šaljemo poruku da mi to izjednačavamo. Ja to nikada neću izjednačavati. Jesi li tri godine zajedno, pa ozvaniči i uštedjet ćeš 20 – 30.000 KM, jer nećeš platiti porez na promet. Druga stvar može tu desiti i zloupotreba, a to je po meni bitnije, jer nije precizirano, nemamo puno podataka. Koliko imamo takvih zajednica na kantonu? Koliko će oštetiti koji grad ili općinu? Onda možemo raspravljati, a po meni ovo nije diskriminacija i diskriminacija je ovdje nad bračnim parovima. Stavljaj ih u istu ravan, a nije isto biti u ratu na liniji, ispred linije ili negdje 3 – 4 kilometra od linije. Nije to isto, a nije ni ovo isto. To su dva različita para opanaka.“

Emira Karić, predsjednica kluba vijećnika SDP: „ Ja ću opet reći da ja ovdje nemam pravo raspravljati o tome da li treba ovo ili ono ako je zakon već rekao da postoji i ako ih je zakon izjednačio. Po meni poslanik Krešić je uočio propust i reći ću zašto tako smatram. Ja ću u narednom periodu raditi na izmjeni pravilnika o ocjenjivanju nastavnika gdje kaže u kontinuitetu od dvije godine nastavnik može steći više zvanje. Imali smo kolegicu koja je na porodijskom, a ima dovoljan broj bodova da stekne više zvanje, odnosno zvanje savjetnika i 50 KM. Po meni ako neko stekne, a ona je bila na porodijskom bolovanju, diskriminacija je prema toj osobi da nema pravo steći zvanje, a bila je na porodijskom. Znači ja sam uočila tu stvar koja mi nije logična i poslat ću gore Pedagoškom zavodu i poslat ću prema Ministarstvu, jer smatra da porodilje imaju pravo biti ocijenjene bez obzira što u pravilniku piše kontinuitet od dvije godine. Ja to tako posmatram. Naravno bit će poslanika i u Domu naroda koji će uočiti neke nedostatke, po njima neke nedostatke, a te inicijative uvijek se stavljaju na dnevni red, diskutuje se o njima i na kraju krajeva izjašnjavamo se.“

Izet Hodžić, zamjenik predsjedavajućeg Općinskog vijeća: „ Puno je nekakvih različitih mišljenja. Ako je to zakonska forma i ovo što kolegica Emira kaže poslato je ovdje, nemamo mi šta raspravljati ako je to zakon rekao. Uvaženi kolega skupštinski zastupnik može, jer imaju institucije kojima se on može obratiti za nesprovođenje zakona, a ne općinski i gradski vijećnici. Mi nismo za to zaduženi. Znači ima apelacioni sud kojem se može pojedinac ili ustanova obratiti. Vi kažete to je zakonski i ja se slažem i šta mi imamo raspravljati o tome. Mi smo to dobili, a vi kažete da je zakonska kategorija, a za nepoštivanje i neprovođenje zakona neko treba da odgovara. Neka gospodin Krešić uputi tužbu apelacionom sudu i to je riješeno. Ustavni ili apelacioni sud će odrediti ako je to tako. Na kraju krajeva kao što načelnik kaže Skupština Tuzlanskog kantona i vjerovatno niko od njih neće pročitati ovaj zapisnik i ove diskusije sa ove sjednice.“

Mehmed Mehinović, vijećnik SBiH: „Naravno ne živim u iluziji da ću ja promijeniti nečije mišljenje po ovome. Mišljenje kao što većina ima imao sam i ja do prije dva dana dok nisam malo pročitao. Međutim dužan sam da kažem sa ove govornice da bilo bi opasno zbog imidža općine da budemo jedini koji će dati negativno mišljenje o ovome. Samo upozoravam, a čini mi se da nas neće koštati finansijski, jer više će koštati Tuzlu, Živinice, Gračanicu itd. nego nas. Ovo je tačno zakonska forma, međutim ima procedura za donošenje zakona i mora se tražiti mišljenje ko je oštećen. To je proceduralno. Čim smo stavili na dnevni red, mi se moramo izjašnjavati o ovome. Ja samo šaljem poruku da razmislimo da li ćemo biti jedini od 13 općina koji ćemo biti negativni.“

Nemojte da nam daje srozan imidž jedna takva odluka po kantonu i svugdje da su oni dali negativno mišljenje. Ja sam isto tako mislio, dok nisam pročitao, dok nisam vidio. Ovo nisu LGB parovi, ovo je muškarca i žene vanbračna zajednica.“

Hasan Hasančević, predsjednik kluba vijećnika SDA: „Kakav je imidž uvaženi kolega Mehmede Vlade Tuzlanskog kantona, kada kaže ne možete planirati općini Doboj Istok ništa od nas, ne damo im. Sada je načelnik kazao, kakav je to imidž. Uvaženi predsjedavajući, kolegica Emira me diskriminiše, molim vas da ne dozvolite to s mjesta. Stavili smo na dnevni red sa razgovarano, a glasala si i ti za dnevni red. Je li raspravljamo? Vi imate jedno mišljenje, mi imamo drugo mišljenje. Da li će imidž biti ovakav ili onakav snosit će posljedicu onaj ko izglasa. Ja stojim na raspolaganju i Borisu Krešiću i Televiziji Tuzlanskog kantona da branim ovaj stav iz milion razloga, jer ovo je kukavičije jaje.“

Selmin Karić, predsjedavajući Općinskog vijeća: „ Ima li još prijavljenih? Nema. Dajem na glasanje. Ko je za ovu tačku?

Glasanje: ZA – 5, PROTIV – 9, SUZDRŽANIH – 1 (vijećnica Zerina Subašić je odsutna).

Predložena inicijativa nije dobila potrebnu većinu.

Zaključujem današnju sjednicu Općinskog vijeća i zahvaljujem vam se na saradnji.“

Sjednica je završena u 11,45 sati.

*ZAPISNIČAR
Behara Hadžić*

*SEKRETAR OPĆINE
Omer Hadžić*

*PREDSJEDAVAJUĆI
OPĆINSKOG VIJEĆA
Selmin Karić*

Službena zabilješka:

Zapisnik je usvojen na 8. redovnoj sjednici Općinskog vijeća Doboj Istok održanoj dana 24.06.2021. godine.

U Klokočnici, dana 24.06.2021. godine

*Zabilješku sačinio
Omer Hadžić, sekretar Općine*